

Eta macartane ema Apóstole Pablo nayehe ena machamuriana ticavasanahi te avasare Efeso, ticaijare

EFESIOS

1 ¹Nuti Pablo, mayehenuhi apóstole ema Jesucristo, taicha manere-
jirunuichuhi ema Tata Vicaiyaquene, navarairahi nímitucaya ena
achaneana eta máechajiriruvana. Tásiha puiti, nucajurehe eta juca carta
eyehe eti nuchamuriana ecavasanahi tayehe eta avasare Efeso, taicha éti
machaneraheripa ema Viya, táuriquenehi eta éhisirahi ema Jesucristo.
²Nuvaraha macatajicahehini ichape ema Tata Vicaiyaquene, émapa ema
Viáquenu Jesucristo. Nájaracahehini eta táurivaina eta epanereruana.

Tétavicavahi eta viúricacarevana táichavenehi eta viúrujasirahi ema Jesucristo

³Núti nucunachaparaca ema Viya, ema Macaiyaquene ema Viáquenu
Jesucristo taicha ichape eta máimicatasirahavihi táichavenehi eta viúruja-
sirahi ema Cristo. Puiti tachichahaviripa eta anuma. Ichape eta viúricacarevahi
maicha ema Espíritu Santo. ⁴⁻⁵Acane, te tamirahu eta táepaniravapa eta
apaquehe, ema Viya tétavicavahi eta máemunasirahi namutu ena achaneana
natiarihiqueneanayarehi. Tásiha, émajivapa manacahi eta mapanereruhi eta
mavarahaquenehi, étarichuhi eta majacapirayarehi namutu ena ticasíñava-
nayare mayehe ema Machicha Jesucristo. Eta viúrujasirayare ema Jesucristo,
yátupiqueneyarehi machichahavi, matapiravarehaviyarehi te mamirahu,
sántohaviyarevare. ⁶Taicha mavarahahi vijirauchayare éma, vítsirijicavayarehi
eta táetaviuchirava eta máemunasirahavihi. Mavarahahivare ichape eta viúrica-
carevana táichavenehi eta viúrujasiraya ema máemunaruquene Machicha.
⁷⁻⁹Tásiha ema Viya, tiúrihi eta máimaira, máimerecahi eta máemunasirahavihi
ichape. Tíjaracahavihi ema Machicha tépeninahaviyarehi eta macaepahairayare

eta vipecaturana, viúchucuhayarehi máicha. Énerichuvare tjaracahavihivare eta véchemaraivaya vímatiequenehairaya ichape, taicha tímitucahavihi eta mapanereruana. Váhisera máimerecavanehini eta juca mapanereruanahi acane; tapaemunava te tíucupaicapa ema Machicha. Tivapínava hi éma eta máitauahiraya eta mapanereruanahi ema Maiya. ¹⁰Tamutu eta juca mapanereruanahi títauchavayarepahi, jácani tatuparaqúipahi. Te jena sáchezare manerejicaripa, ema Viya manacainapa ema Machicha Jesucristo aquenucaque-neyarehi, téchayarehi tamutu eta táichararacavana. Nasuapayarehiva namutu ena tiávihanahi te anuma, énapa ena tiávihanahi te juca apaquehe.

¹¹Eta acane te tépanavainapa, ema Viya máetupiricapa eta mapanereruhi. Vahi máejequihahini. Tásiha, manacapa eta mavarahaquenehi. Acane tinerejicahavihi machichahaviyarehi vimutu viti viúrujicanayarehi ema Jesucristo, mavarairahi tjaracahavi eta vícuchianahi. ¹²Viti vínapuicanahi véhica ema Cristo, mavarahahi tíuriyare eta vítaresiraya, apaesa nacunachayare ema Viya ena apamuriana achaneana eta máimicatasirahavi ichape. ¹³Tacutiquene éti, te tínapucainapa esama eta máechajiriruva ema Viya eta mavarairahi ticuchucahahe, enévanehi éhichi ema Cristo. Tásiha, eta iúrujiasiraipa éma, tiávahácheripavare ema Espíritu Santo. Émapa títametacahe eta machichairahapa ema Viya. Ema Espíritu Santo, ema vituparahahi vimutu viti vicasiñanahi ema Cristo. ¹⁴Eta mávahásirahavihi éma, títametacahaviparaca eta víjacapiraya eta vícuchianahi mayehe ema Viya te táitecapapa eta viúchucuiraya viti machichanaveanahi. Tásiha, tétaavicavainapa eta vicunachirayare ema Viya taicha ichapequene eta máimicatasirahavihi.

Te tiyujaraca ema Pablo, mayaseaca ema Viya eta náitupajijiasiravaina ena téhicanahi ema Jesús

¹⁵⁻¹⁶Eta tacahe, núti néchahehi éti tamutu te nuyujarasirana, taicha nusamairiricapa eta yátupirahi éhica ema Viáquenu Jesucristo étapa eta émunajirisiracacahi emutu eti machaneranahi ema Viya. Nuhasulupayachahi ema Viya eyehe. ¹⁷Éma, macaiyaquenehi ema Viáquenu Jesucristo. Máetaviurehi eta majaraiva te mávihahi te anuma. Nuyaseacahi máijaracahahini eta échema-raivainahini maicha ema Espíritu Santo, apaesa ímatiequenehahini yátupina eta emetacasilanaya eta mapanereruanahi ema Viya. Nuvaraha ímatipai-pachaini éma. ¹⁸Nuyaseacahivare éma yátupina eta ecaicutiarairaya, eti máichuhaqueneanahi éma, eta táetaviuchirayarehi eta viúricacarevayare te jena sáchezare vicuchapaquenehi. Nuyaseacahivare ecaicutiaraya eta táetaviuchirayarehi eta táuricacarevayare eta viávihiya te anuma, vícuchihi viti machanerana ema Viya. ¹⁹Nuvaraha ecaicutiaravare eta táetaviuchirahi eta máitupajijiasiravahi ema Viya, váhiquene tivitaimahi. Éma, macaemata-neacahi eta vítaresira, mavarairahi viúripanayare viti vicasiñavanahi mayehe. ²⁰Ema Viya máimerecachi eta máitupajijiasirava ichape te macaechepucapa ema Cristo te máecari, macaejacapa éma te mavaure tayehe eta anuma mávihahi

puiti. ²¹ Ema Cristo, émaripa ichapequenehi aquenuca nayehe ena ángeleana. Tétavicavahi eta masuapacarevahi nayehe. Énerichuvare ena éreanana, mapamicavaca eta nasuapiraina. Éma, tétavicava eta macapicahuirahi. Nájina nácutihini éma. Nájnavare ticachuricaímahi. Apajarahiyarehi eta aquenucaira éma. ²² Ema Viya macaejacahi éma téchahi tamutu eta tatiarihiqueneana. Émaripa vicaiyaquenehi vimutu viti machanerana. ²³ Víti, eta viúrujasirahi éma, tímicutijiricavaipahi máquehehavihi te juca apaquehe. Vicaemataneacahi eta táuriqueneana tímicutijiricavahi émainahini macaematanehini, taicha tamutu eta víchaqueneanahi, éma téchahavihi, tétumechahavihivare.

**Eta máemunasirahavi, ema Viya ticuchucuhavihi
tayehe eta vícuñayahíni**

2 ¹ Ema Viya tíjaracaheripa arairupa eta ítaresira. Tichavapa títareca eta íachanevana, tacuti eta machavirahi títareca ema Cristo te máecari. Taicha éti, cape juca ítaresirahi, tímicutijiricavaichaha épenaquenénahíni táichavenehi eta evinarajivanaini étapa eta epecaturanaini. ² Cape juca ítaresirahi éti, éhichavire eta tayaherepiana eta apaquehe, tamauriqueneanahi. Esuapahivare eta mavarahaqueneana ema Váinaraji, éma mapamicavacahi ena achaneana masuapajirairahanahi me Viya. ³ Vimutu viti, tacahenihi eta vítaresirahi eta acane. Étachucha véhicahi eta tavarahaqueneana eta víaquehe. Vítijiricavaripahi víchahi eta tajamurachaqueneana eta víaquehe, étapa eta vipanereruana tamauriqueneanahi. Ichapemurihi eta vímiyusemasirahi ema Viya, vicutili ena apamuriana masuapajirairahanahi mayehe. ⁴⁻⁵ Tímicutijiricavaichaha vépenaquenénahíni táichavenehi eta vipecaturanaini. Tétavicavasera eta majapanuirahavihi ema Viya. Ichapevare eta máemunasirahavihi. Tíjaracahaviripa arairupa eta vítaresira táichavenehi eta viúrujasirahi ema Cristo. (Táichavenehi eta majapanuirahahi, ticuchucaheyarehi.) ⁶ Puiti, eta víávahásirahi ema Cristo, yátupihí eta véchepusiraya, vicaicuchipa eta macaejasirahavinapa tayehe eta víávacureyare te anuma, vicachanya ema Cristo. ⁷ Eta juca émavenehi ema Viya, mavarahahi máimereca maverahi eta viúricacarevana máijararuhaviyare eta veyehe te jena sácheyare, taicha tétavicavahi eta máemunasirahavihi táichavenehi eta viúrujasirahi ema Jesucristo. ⁸⁻⁹ Taicha eta viúchucuirayare eta víápechiravaya vítareca, étavenehi eta majapanuirahavihi ema Viya. Vijacapacareripa eta mayehe, táichavenehi eta vicasíñairahi ema Jesús. Vahi étaparacaina tacuchucuhavihini eta víchaqueneanahi, taicha vahi vítijivainahini váratahahini vijacapacarehini. Tacahehi éta, apaesa nacuija nacucasiñavavaica eta nacuchucuiravapuca. ¹⁰ Arairuinapa eta vítaresira maicha ema Viya. Émarichuvare ticajurucahavihi eta véhisirahi ema Jesucristo, mavarairahi víchayare eta táuriqueneana. Eta víchirahi, vítauchahi eta mapanereruana acane.

**Eta véhisira ema Jesucristo, étamurihavinapa.
Vaipa víputsimuriavavacaimahi.**

¹¹Németeaca échavahi éti eta nacatianasiráhehi ena nujaneanana táichavenehi vahi éhichahini eta nayeherepiana. ¹²Éti, cape juca, tájina ímatiyahini eta máimiturapianahi ema Jesucristo. Vuíchahavare ímatihini eta iúricacarevayarehi táichavenehi eta matratune ema Viya viyehe viti israelítana, taicha ticaerajicaheanahi te vimuri. Vuíchahavare ímatihini eta ícuchianayare máíjararuheanaya ema Viya. Eta tacahehi, éti ímijachaipa vahi ejacapacare eta mayehe. Vuíchahavare ácasinavahini eta mayehe. ¹³Puítipasera eta éhisirahi ema Jesucristo, iúrujicaripahi éma. Tásiha, émeñahavaipahi mayehe ema Viya, taicha ecasinavahi eta máepeninahéhi ema Jesucristo. ¹⁴Énerichuvare, étavenehi eta viúrujiasirahi éma, tihétamurichahaviripahi vimutu: éti apavasanana, vítipa viti israelítana. Vaipa víputsimuriavavacahini. Tímicutijiricavaipahi étanainehi eta viúchusine. Macaepaharipahi eta vicatianajirísiracacáinihi. ¹⁵⁻¹⁶Eta máíjararesirahi eta máquehe te crusu ema Jesucristo, macaepaharipavare eta tapamisirahavini véhica eta vanairipiana étapa eta nayeherepiana típicauchacareana. Puiti, vaipa étaparacainahini eta viúchucuiraya. Énerichuvare macaepaharipa tamutu eta vicátianajirísiracacáinihi táichavenehi eta apavasanahavirahi. Puiti vimutu viti véhicanahi ema Jesucristo, étamurihaviripahi máicha. Tájina víchiravaimahi. Táitusiava tiúrichahaviripa vimutu mayehe ema Viya.

¹⁷Eta tímitecahi ema Jesucristo, timetapanahavihi eta táurinaquene echajirirucava eta najacapacarevaya namutu ena achaneana. Éma, tiúrichahaviyarehi mayehe ema Viya vimutu: viti vínapucanahi vímati eta máechajiriruvana, étipa eti epaenumavahi ímati eta máechajiriruvana. ¹⁸Puiti, eta viúrujiasirahi ema Jesucristo, tiávahácahavihi ema Espíritu Santo. Tásiha, máichavenehi ema Espíritu Santo, vimutu viciticacaipahi eta vipauchiraipa ema Tata Vicaiyaquene. ¹⁹Eta tacahe, tájinapa táeñamacarehini eta ejacapacareva eta viyehe viti machanerana ema Viya. Esiapamurihahaviripahi víti. Tachichaheripa eta mávasa anuma. ²⁰⁻²²Eta esiapamurihvirahi te vimuri, nímicuticharipa te náepiyaca eta ichape peti. Ema Jesucristo, tétavicavahi eta máetumechirahavihi vimutu viti véhicanahi éma. Macuti eta tatumearaya eta yúchamana, eta manasirahi eta máimiturapiana. Tásiha, visiapa viti apóstoleana énapa ena profetana. Tacahe éti, eta esuapirahi eta vímiturapiana, esiaparipahivare. Ecuti eta labriyuana étapa eta yucuquiana. Ema Espíritu Santo, tétavicavahi eta máitupajijiasiravahi tihétamurichahavihi. Vituparahapachuhi eta manasirahavihi. Máepiyacavacapaipa. Te máítauchapa tamutu, tétavicavainapa táurinavaya eta ichapequenehi templo, mapenayare ema Viáquenu, sántoquenehi.

**Éma Pablo, éma ticatuparahahi ticametarairuyare
nayehe ena apavasanana**

3 ¹⁻²Németeaca nuti ímatiequeneharipa eta máetaviuchirahi eta máemunasirahehi ema Viya. Éma, tivanecanuhi níchuhaheya eti apavasanana, mavarairahi éhicayare ema Machicha Jesucristo. Eta juca nucametarairuirahi eta eyehe, étara tiviuchanuhi puiti juca nucaeratairahi. Nútisera nuyaseuchaheparaca éti te nuyujarasirana. ³⁻⁴Taicha ema Viya timetacanuripahi te nuvapure eta mapanereruhi tapaemunava téchacarehi. Puiti te juca nucartane, eta échajicuira eta nájurehi, németeaca ímatiequenehayare tamuturipa nímatiequenehahi eta mapanereruhi ema Viya tayehe eta macuchusirahavihi ema Jesucristo. ⁵Eta juca mapanereruhi ema Viya, nájina náimatiequenehahini cape juca tásinequenehi. Puftisera, ema Espíritu Santo tímechahaviripa viti mayeheana santo apóstoleana énapa ena profetana. ⁶Ani tacahehi eta juca tayumurevanainihi: Eti apavasanana, éti apanavare ejacapacarehivare mayehe ema Viya maicha ema Jesucristo. Íuchuchayare táichavenehi eta éhisirayare eta vimetarairuana. Esiapamuriahaviyare viti machanerana ema Viya. Étamuriahaviripa. Viciticacainapa eta vícuchihi viti israelítana.

⁷¡Tétavicavahi eta majapanuiranuhi ema Viya! Nútisamipa máichuhaquenehi eta nucametarairuyarehi eyehe. Tásiha éma, tétavicavahivare eta máetumechiranuhi te tamutu eta nucametarairuirahi. ⁸Vahi németeacavahini nútinasamihini manerejica, taicha nararihíhi ena títupajijiapanavanahi eta nuyehe. Tijapanunuhisera ema Viya. Nútisamipa manerejiruhi, mavarairahi numetapanawe eta máichuirahéhi éti apana eti apavasanana, eta ejacapiraya eta táuricacarequene vícuchi maicha ema Cristo. Tétavicavaya eta víuricacárevayare. ⁹Tacahehi eta mapanereruhi ema Viya eta viyehe acane te tépanavainapa máepiyacaya tamutu. Váhisera tájjahúchavahini mametacahavihini. Tapaenumava timetacanuhi núti, matuparasiranuhi eta numetasiraheyare tamutu. ¹⁰⁻¹¹Taicha mavarahahi natiarihiyare camurianayare ena tisuapanayare yátupi. Eta táurivayare eta náehisira, tímereuchayarehi eta máetaviuchirahi eta máitupajijiasiravahi ema Viya. Náraminehi ena aquenucanahi tiávihanahi te anuma eta náimairahi eta juca. Eta tacahehi eta mámirapahi ema Viáquenu Jesucristo tamutu eta mapanereruana eta acane ema Maiya. ¹²Tásiha puiti, tájjina táeñamavacarémahi eta vipauchira ema Viya. Vicasíñavahi eta mayehe, taicha ema Jesucristo émahi ema vicasíñasarequenehi. ¹³Eta tacahe, nutuparacaheya: Vahi ecuinajicava eta juca éhiruhi, váhivare ecupica eta esamairirisirahi eta nucaeratairahi táichavenehi eta nucametarairuirahi eyehe. Evapinavasera eta nucamichirahi eta nátajivana, taicha nuvarahahi nímereca eta táetaviuchirahi eta némunasirahehi.

Ena Pablo mayujaraucha ena machamuriana

¹⁴Eta némechirana eta táetaviuchirahi eta máitupajijiasiravahi ena Viya eta juca mapanereruanahi, núti népuyumiraucha ena Macaiyaquene ena Viáquenu Jesucristo, nucunachirahi éma. ¹⁵Éma, Táiyaquenehi tamutu te anuma. Émarichuvare téchahi tamutu te juca apaquehe. ¹⁶Nuyaseaca éma máijaracaheni éti, ichapenahini eta ítupajijiasirava étapa eta etumevaihini te iáchanevana, maicha ena Espiritu Santo. Taicha ena Viya, tétaficava eta máitupajijiasirava, váhivare mayavainaimahi. ¹⁷Nuyaseacavare yátupina eta ecasiñairaya ena Cristo, yátupinavare eta éhisiraina eta máimiturapiana. Túmeheyare eta émunaravahi. Tájina tihapapicahémahi eta éhisirahi. ¹⁸⁻¹⁹Nuyaseacavare ácutihini ena apamuriana echamuriana te tamutu avasareana, te yátupina ecaicutiara eta táichapevahi eta máemunasirahavi ena Cristo. Tájina títaina éta. Tayanapane vahi vicúcaicutiaraquenéna. Nuyaseacahivare yátupina émainahini ecasamure ena Viya.

²⁰Tétavicavahi eta nucunachirahi ena Viya, taicha máiturueque-nehahi tíjaracahavi tamutu, máemetavicahi eta viyasearuanahi, étapa eta vipanerechirana. Tétavicava eta máitupajijiasirava ena Espiritu Santo eta máetupirisirahi eta visamureana. ²¹¡Vicunachaparacahini ena Viya vámutu viti véhicanahi ena Jesucristo! ¡Máichecuaraquirénapa eta vicunachira! ¡Amén!

Viúrujiacacahi maicha ena Espiritu Santo

4 ¹Yátupi núti tipresuchanuhi puiti táichavenehi eta néhisirahi ena Viáquenu. Eta tacahe, nutuparacaheya: Tacuija íchiravaina eta ítairesira te mamirahu ena Viya; taicha éti máichuhaquenéherichuhi éma, mavarairahi machaneraheyare. ²Yátupina eta emansuvaina, étapa eta iúrivaina. Ecayehe paciencia. Ecamichayare jácani te ticaviurevanapuca nácani echamuriana, táichavenénahi eta émunasiracacainahi. ³⁻⁴Émanarichuvare ena tiávahácahe, émaripa ena Espiritu Santo. Ísapava eta macurujisirahéhi. Tacuija íchiravaina eta iúrujisiravahi. Étanainarichuhi eta epanereruana. Taicha ena Viya tíchuhahehi. Puiti ecuchapahi eta íápechiravayare ítareca. ⁵Émanarichuhi ena Viáquenu. Tacarichuhi véhica eta máimiturapiana. Étanarichuhivare eta vicaicachasira eta viúrujasira éma. ⁶Émanarichuhivare ena Viya, Vicaiyaquenehi vimutu. Éma téchahavihi vimutu. Ticaemataneacahavihi vimutu. Émavare tijaneacahavihi vimutu.

Vítucaquenepachuhi maicha ena Espiritu Santo

⁷Énerichuvare ena Cristo, éma tíjaracahavihi eta vítucaqueneyarepachu, jácani mavarahaquenehi. ⁸Taicha eta Sagrada Escritura, ani tacahehi: “Te tiárapa éma te anuma, mámamurihapaipa ena macuchureanahi. Máijaracasichavacapa

eta náitupujjiasiravaya ena machanerana” tacahepa. ⁹Epanerechaya puiti eta tacayemaquenehi eta márairahi. Eta juca tavaraha vicaicutiara eta máucupaisirahi tativa te juca apaquehe. ¹⁰Te títauchavapa eta tímiucupaicahi, tíarapa tichavapa te mávasa anuma. Tichavavarepa eta émaírayare técha tamutu. ¹¹Tásiha, ema Viáquenu tituparachavi víti, tíjaracahavivare eta vítucaqueneanayarepachu. Taicha tinacahavípa eta viávacurepachuya apóstolehaviya viti manerejiruqueneanahi. Ena apamuriana, manacahivare profetanahi náimatiequenehayarehi eta mapanereruanahi ema Viya apaesa náitametacavaca ena vichamuriana. Ena apamuriana, manacavare ticametarairurashianayare, náichuhayare ena achaneana náehica ema Viáquenu. Ena apamuriana, manacavacavare pastóreanayarehi, najaneacavacayare ena vichamuriana. Énapa ena apamuriana, manacavacavare máestroana, náimitucavacayare eta máimiturapiana ema Viáquenu. ¹²Taicha éma, mavarahahi máetupiricayarehi tamutu te etaracu eti machanerana; mavarahivare vitiarihiyare viti vítátijiricaheyare eti vichamuriana, vicajurusiraheyarehi eta éhisirahi éma. ¹³Apaesa yátupina vácuti vámutu eta máurivahi ema Machicha ema Viya; táitecapavanevaréni eta sache eta viúrujisiravaya, tájinapa tahapapicahavimahi eta véhisirahi; vítamuturucaripahini tamutu eta vítucaqueneanahi tásihaqueneanahi me Cristo. Vácutipaini éma tamutu eta máítupajjiasiravahi. ¹⁴Mavarahahivare vimutuyare vímatiequeneha. Vaipa vácutimahi ena amuyana, témunanasicavanarichaha éna. Tísapajiricavanarichaha navayuaca tayehe eta apana náimiturapiana ena títuruequenehana tivayuarecana, napamisiravacahi namutu náehica eta tamauriqueneana. ¹⁵Eta tacahe, vétumechavayare eta véhisirahi eta máimiturapiana yátupiqueneana, yátupinavare eta vémunaraivahi, vicajurucacayahivare eta viúríva, vicutiya ema Viáquenu Jesucristo, taicha émahí ema téchahavihi. ¹⁶Nímicutichahehi eta viáquehe. Camurihi eta táunavahi eta viáquehe; étanaichuhisera. Camurihivare eta táitupajjiasiravanahi; tamutuhisera ticaematanehi, víchirahi eta vivarahaquenehi. Tájiná vahi táejiacavahini. Tamutu tijaneacacahi. Ene vicahehi viti machaneranehi ema Jesucristo. Éma, vétumechahavihi vimutu víti. Eta viúrujiasirahi mayehe éma, étamurihavihi. Vimutu vítucaquenepachuhi máicha. Vématanerepipachuhi máicha. Vijaneacacahivare. Vicajurucapapahi táichavenehi eta vémunasiracacahi.

Apanainapa eta vítaresira taicha eta viávahásirahi ema Cristo

¹⁷Eta juca numetarapiana eyehe, nutuparachéicha taicha matupararunuhi ema Viáquenu. Nucavanairipipa puiti: Vaipa ecuapecha ecuquicha eta náichaqueneanahi ena máimatirahanahi ema Viya, náichahi éna eta náítaresirahi jácani tavarahaqueneanahi eta napanereruana súnsurupiana. ¹⁸Tamutu eta napanereruana tétavicavahi eta tamapicuvahi. Vahi apaesainahini tavehahini eta tijarahi. Máecharaireanahi éna, táichavenehi eta tamuracavahi eta nasamureana. Váhiquene navarahaimahi napaucha ema Viya apaesa macanaracavacahini éna. ¹⁹Tájinapa apaesainahini náimatihini eta titsirihacare. Tíjaracavanapa tayehe tamutu eta najamuraraivana. Tétavi-

cavahi eta navapinairahi náichahi eta tamauriqueneana tájiparacana. ²⁰Étiseravahi tacucahe eta ítasesiraya puiti eta éhisirahi ema Cristo. ²¹Taicha németeaca yátupihí esamararacahi eta vímitusirahehi. Ímatiripahi eta táuriqueneanahi yátupiqueneanahi tásihaqueneanahi mayehe ema Jesucristo. ²²Tásiha puiti, vaipa ecuesacha echavaucha eta ítasesirainihi acane echipejiricavahi taicha tivayuacahe eta ejamurachirahi eta tamauriqueneana. ²³Puiti éti, ísapaya ema Espíritu Santo mávahácahe, máitsivachirayare eta epanereruana étapa eta ejamurachirana te íachanevana. ²⁴Tásiha, apanainapa eta ítasesiraya. Yátupi eta ecaquehéraina ema Viya, ácutini éma eta máurivahi étapa eta masantuvahi.

Étupiricayare tamutu eta ítasesirana

²⁵Tásiha puiti, vaipa épiyahirahimahi. Étupiruvayare tamutu eta échajirisiravaya nayehe ena echamuriana eparaepiyana, taicha étanarichuhi eta echamuriracairahi, émanarichuhivare ema Viúrujaruhi, ema Jesús.

²⁶Te tatiarihipuca eta táimiyusemacahe, ejaneacavaicha machu ecapectura. Te esemapuca, vahi tacunasi eyehe. Énevanéna eperdonachacaca. ²⁷Ecaunevayare, machu máiturucahe ema Váinaraji, táichavenénahi eta esemanevahi.

²⁸Mácani tíamerahinihi, vaipa macuapechava macuamereca. Mácaematane apaesa macunachacare, apaesavare eta jácani máematanevachayare eta maviyihayare eta macajirayare ena ticamunuvanahi.

²⁹Váhivare ecunacajacachava eta tájiparácana echájirirucavana tamauriqueneana. Tátupiruva eta échajirisiraváina apaesa étaina eyuchusiha eta nasuapiraina nácani tisamaheanayare, éta tétupirisa-murechavacayare éna. ³⁰Vahi ecuisapava ícha jácani tamauriqueneana, machu ímipanerereca ema Espíritu Santo, émaripa ema sántoquenehi, tíavahácaheripa éma. Eta mávahásirahehi tímicutijiricavaipahi eta ecamaracahi, taicha ímaticaréipahi eta machanerahéirahi ema Viya; puíticha, étapa eta te títecapapa eta jena sáchezare viúchucuirayare.

³¹Váipavare ecunaca eta semanereana. Váipavare ecatianarahimahi. Váipavare ecusemarairihi, váhivare ecujajachava ecapiaracava. Vahi ecuichanareca. Ínajicaya éti tamutu eta júcana tamauriqueneana. ³²Táitsiva étaviuchayare eta iúrivayare nayehe nácani apamuriana, ejapanurahiyare. Te tatiarihipuca eta náejecapirava, eperdonachacacayare taicha ene macahehi ema Viya eta maperdonachirahehi máichavenehi ema Cristo.

Tiúriyarehi eta náitasesirayare ena machichanaveanahi ema Viya

5 ¹Puiti éti machichaheripahi ema Viya, máemunaruqueneheripa, tásiha ácutipa éma eta máurivahi. ²Émunajiricacayare eta ítasesiraya. Ecutiyare ema Cristo eta máemunasirahavihi. Éma, macurisamurecharipa ema Maiya eta máimijarasesiravahi víchavenehi víti, macutihi eta sárarechicha uvesa nacaparuhi eta námavahuhi me Viya.

³Eta machaneraheripá emá Viya, vaipa táuricahini íchahini eta túhusicare. Tíñehi te mamirahu emá Viya. Váhivare ecupanerecha ícha jácáni tiámanahi eta támaraiqueneana. Váhivare tacuvayuacahe eta tájiparácana. ⁴Vahi ecunacajacachava eta échajirirucavana titsirihacarepiana, súnsurupiana, tájiparácaqueneana, taicha tájina tacunachacarévaina éta. Tamutusera eta échajisiranaya, amairipiquenéna eta ehasulupayachiraya emá Viya. Jéhevare, éta iúrihaquenehi. ⁵Németeaca ímatiequeneharipa éti eta vahi tíuchucuhanimahi nácani ticaehicacanayare, emá achane te mavehapuca esu esena apayena, esu esena te suvehapuca emá achane apaima; nácanivare ena amaperuana tivehajiricacani; mácanivare achane mavehapuca emá maparajairava; nácanivare tijamurachana tamutu jácáni náimahaqueneanahi. (Ena tavayuacavacahi eta najamurachirana, énarichuhi ticasíñarajiana.) Namutu ena nani tímereuchavanahi vahi machanerainahini emá Cristo. Vahi tisiapanaimahi te mávasa emá Viya. ⁶Tásiha éti, vahi ecuisapava nácani navaraha navayuacahe te náechajiriruva súnsurupiana, napamisiraheya ícha eta júcana támaraiqueneana, taicha eta júcana, éta tiviuachavacayare nácani masuapajirairahanahi me Viya, muracayare eta náicuñayare. ⁷Tásiha, ejaneacava, machu ácuti ena nani tíchanahi eta júcana támaraiqueneana. ⁸⁻⁹Échavaripa tacáhénihí eta ítaresirahi acane étarichu íamapiricainihí iávacuhahi te timapícu. Puítisera eta iúrujasiraipe emá Viáquenu, tijarahiripa eta ítaresirahi. Tásiha, ímerecayare eta emicauchirayare ena apamuriana achaneana, ímeresirayare eta iúriya, étape eta tipachinaqueneana eta ítaresira, étape eta yátupirahi eta éhisirahi emá Viya. ¹⁰Tamutu sácheana ecaravahuinavarepa eta mavarahaqueneanahi máuriruanahi emá Viáquenu. ¹¹⁻¹³Ejaneacava éti, machu íápechava ícha eta támaraiqueneana náichaqueneásahi ena achaneana te timapícu. Taicha tétavicavahi eta tatsirihacarevahi eta náichaqueneanahi eta nayumurusiravahi. Étisera ímitucavacayare éna. Emicauchayare eta támaraivahi eta náichaqueneana, apaesa náimaha eta táíñehivahi eta náichaqueneanahi. Tásiha, natiaríhipuca ena tivarahanaya náinajicayare. ¹⁴Eta emicahuchiravaca éna, tacuti eta táechajiriruva eta jirasare, ani tacahe:
 Pítisami pímicutijiricava pépenaquene taicha
 eta tavayuasiravihi eta pecatuana.
 Péjamiuchavaichu eta pímacacarasiravahi
 te timapícu.
 Písapava macaechepucavi emá Cristo,
 mavarahahi tímícauchaviyare.

¹⁵Eta tacahe, yátupina eta ejaneasiravaina. Vahi ecucuti ena máecharaireana. Ímerecavaya eta ítupajijiasiravahi. ¹⁶Camapuravachaha tamutu sácheana eta ímitusiravacahi ena achaneana, taicha maverana ena tíchanahi eta támaraiqueneana. ¹⁷Tacuija eta esunsuvanaina. Epanerechayare apaesa ácaicutiara yátupi eta mavarahaquenehi emá Viáquenu. ¹⁸Vahi ecucavaha taicha éta ticauyayacarehi ticamitiacahe. Ísapavasera émaira

máechahe ema Espíritu Santo tamutu eta ítaresira. ¹⁹Eta ímiturapiyare nayehe ena echamuriana, eta salmo étapa eta jirasareana majirahuana ema Viya. Eta ecunachirainahi ema Viáquenu, iúrisamureyarehi eta ejiraira. ²⁰Ehasulupayachaparacaya ema Vicaiyaquenehi te máijare ema Viáquenu Jesucristo tayehe tamutu jácani íchararacavana taicha tásihaqueneanahi eta mayehe.

²¹Emutu éti, ímereco eta iúriwa táichavenehi eta epicauchirahi ema Viya. Ísapava eta nacamunuirahahi ena echamuriana. Vahi étainachucha éhica eta evarahaqueneana.

Ema achane ésupa esu mayena náimerecayarehi eta náuriva énajicacayarehi

²²Étiripa eti esenana ecaimaqueneanaripahi, tituparacahehi epicauchayarehi ena ímanaveana. Esuapajirahiyarehiva nayehe, tacutiyareichu eta esuapirahi ema Viáquenu. ²³Taicha mácani achane, tatuparacahi éma, téchaya eta máitátiraya esu mayena, tacutihi ema Jesucristo tatuparacahi éma téchahaviyarehi vimutu viti véhicanahi éma. Émarichuvare ema ticatiuchahaviya vimutu viti machaneranahi. ²⁴Tásiha, yátupihí eta vípicauchirahi visuapahi ema Cristo. Ene nacaheyarehi ena esenana, nasuapayarehi napicauchayarehi ena náimanaveanahi te tamutu.

²⁵Étiripa eti náimanaveanahi, tituparacahehi émunacavacayare ena eyenana, tacutihi eta máemunasirahavihi ema Jesucristo viti machaneranahi. Éma, tímijararecavahi víchavenehi, ²⁶taicha mavarahahi tisantuchahaviyarehi. Tásiha, masipahasinahavipa eta viáchanevana eta visuapirahi eta máimiturapiana. Eta masipahasirahavi tacuti eta sucavira te une esu araimayare te tétupiricavapa tayehe eta sucaimairayare. ²⁷Taicha mavaraha tacuija víchiravaina viti machanerana te táitecapa eta sache vitupihamirauchirayare éma. Vétaviuchayarehi eta viúrinavaya. Tájina véchipejicaimahi, tájinavare tijararecavimahi, apanaimahi víchava. Mavarahavivare tétavicavayarehi eta visantovaya. Yátupi matapiravarehaviya víti. ²⁸Ene ecaheyarehi eti náimanaveanahi, ímerecayarehi eta émunasirahi ena eyenana, tacutihi eta émunasirahi eta iáqueheana. Mácani máemunacahi esu mayena, tímicutijiricavahi eta máemunasiravahi éma. ²⁹Taicha viti achaneana, eta vítaresirahi, váhiquene vicatichaimahi eta vécheana. Tétavicavahi eta vijaneasirahi, véchapajiricahi, vénicahivare eta véche. Ene macahehi ema Cristo eta majaneasirahavihi, máechapajirisirahavivare viti machanerana. ³⁰Víti tímicutijiricava eta táunavanahi eta máquehe táichavenehi eta viávahásirahi éma. Vicutijiricavavare eta maeche, máperanavare. ³¹Échavaya eta táechajirisirahi eta Sagrada Escritura, ani tacahe: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa títaticacanayare. Eta navehacacairahi, tímicutijiricavaipa étanarinehi eta náqueheana” tacahepa. ³²Te juca tametarapi, jararihi eta tacayemaquene

tayumurevaquenehi. Puiti nímitucahe: Viti machanerana ema Cristo, eta víurujiasirahi éma, étanamuriháviripa tacuti eta étanarinehi eta náqueheana ena ticaimanahi. ³³Tásiha, nuvaraha yátupina ácaicutiara eta juca nucayemaquenehi. Tituparacahehi eti ajairana, yátupina eta émunasiraina ena eyenana tacuti eta émunasirahi eta iáquehe. Énerichuvare eti esenana, tituparacahehi epicauchayarehi ena ímanaveana.

Ena amaperuana, náimerecayarehi eta náuriva nayehe ena ticachichana

6 ¹Étiripa eti amaperuana, yátupina eta esuapajiraivaina nayehe ena ticachichaheana, taicha tituparacahehi ene ecaheyarehi eta éhisirahi ema Viáquenu. ²⁻³Ema Viya tíjaracavapa tíjaracaheyare eta iúricacarevaya eti esuapajirahiana, taicha ani tacahe eta máechajiriruva: “Epicauchayare ena ticachichaheana. Te esuapajirahi éti, nucajurucaheya te apaquehe. Tájina íchiravaimahi, iúritaresirainapa” macahepa. Tétavichavahi eta tasuapacarevahi eta juca mavanairipi ema Viya eta eyehe.

Ena náiyana, náenana, táurini eta náímitusiravacaina ena nachichanaveana

⁴Énerichuvare, eti náiyana, náenana, vahi ecuimiyusemaca ena echichanaveana tayehe eta evanesirana. Tauri eta ecavanairipira, apaesa napicaurahi eta najurusiraina, énajivayare ticaratacavana. Ímitucavaca tamutu eta máimiturapiana ema Viáquenu, apaesa nasuapajirahi.

Ena ticaquensurecana, táurini eta nacaemataneasiraina

⁵Énerichuvare eti ecaquensurecana, tituparacahehi esuapajirahiyare nayehe ena iáquenuanahi. Epicauchavacayareva, émunacayareva. Táurivainahini eta ecaemataneasirahi, tacutirichu eta táurivahi eta ecaemataneasirahi ema Cristo. ⁶⁻⁷Evapinavayarehi te esamureana eta ecaematana, vahi tacucarichu te natiarihi ena iáquenuanahi te emirahu. Vahi ecuyacujiriraha. Evapinavayaresera eta ecaemataneasirahi éna, taicha émarichuvare ema Viáquenu ema ecaematanearuhi. Ímrecavayare eta yátupirahi mavanarachehi éma. Tacaheyarehi eta ítauchirayare eta mavarahaqueneana ema Viya. ⁸Taicha écharipahi émutu éti, vijacapayare eta vícuchihi mayehe ema Viáquenu te vítauchahi tamutu eta táuriqueneana. Vahi manerejicaimahi nácani líbreanahi énapa ena ticaquensurecanahi; vínunayarehi tayehe eta vícuchihi.

Énapa ena náquenuana, tituparacavaca eta náurivaina nayehe ena nachanerana

⁹Énerichuvare eti náquenuana, tituparacahehi iúriyareva nayehe ena echanerana, eJapanuyare éna tayehe eta evanesirana. Vahi ípicarare-recaimahi te evanesirana. Ínunayarehi échava eta matiarahirahi ema Iáquenuhivare éti apanava, ema tiávihahi te anuma. Taicha éma, nájina máepuruquenéna ena acha neana.

Yátupina eta vicasiñavairahi me Viya; vétumechavavare eta véhisirahi

¹⁰Puiti nutuparacahevare, nuparapenaveana, ecasiñava yátupina mayehe ema Viáquenu apaesa máíjaracahe éma eta matumeva étapa eta máitupajijiasirava. ¹¹⁻¹³Nuvaraha numetacahe eta juca: Ema Váinaraji ticanarahavihi víti machanerannahavihi ema Viya. Tétavicavahi eta mavarairahi tíaquipai-cahavi. Tásiha, tituparacahavi eta véchapajirisiravaya eta vicatiuchiravaya mayehe éma. Natiarihivare ena camuriqueneana majupahana, énapa ena masuntarurana. Váhisera achaneanainahini, váhivare viparaepiyanainahini. Éreananahi éna, váinarajiqueneanahi. Tétavicavahi eta nasimutuvahi éna. Tétavicavahivare eta náitupajijiasiravahi étapa eta natumeva eta nacaematanera tayehe eta juca apaquehe, tamapicuquenehi náicha. Eta tacahe, échapajiricavayare eta ecatiuchiravayare tayehe eta mavayuarauiana ema Váinaraji. Étumechava eta éhisira. Ecuti ema suntaru ticasínavahi tayehe eta mamuiriha vahi tasiapahacaimahi eta espada. Tásiha, eratahayare ecamicha tamutu eta ecatajivairana. Vahi ecainajiruvaimahi. Iáquipaicayareva namutu ena machamuriana ema Váinaraji. ¹⁴Yátupinahisera esuapa eta vímiturapiana yátupiqueneana. Vahi ecuchavacuéjehava. Átupiruvahini eta ítaresirahi. Ecutiyare ema suntaru, manacahi eta máitijuhe, étapa eta fiérromehi tíavichayarehi eta matupa, tájinasarepa náicharaca ena mánarana. ¹⁵Vahi tacuechuquila eta ecametarairuyare eta majacapiraya ema Viya namutu ena achaneana. Etanucayareva eta eparupevaya apaesa erataha eta epaisirayare te acheneana eta ítecapirayare tayehe eta tayerehiqueneana avasareana. ¹⁶Tacutiquene eta ticamunucarehicha, yátupinahi eta ecasiñavairaina mayehe ema Viya. Eta ecasiñavairayare táimicutijiricavahi íavihuinahini eta ticaemahaequenehayarehi eta tamuruirapahi eta mayucaraqui ema Váinaraji. ¹⁷Tacutiquene, ecasiñavahi yátupina eta iúchucuirayare, tácuti eta macasiñavaira ema suntaru eta mayehe casco te machuti. Iúnacahi eta máechajiriruva ema Viya, máimiturehequenehi ema Espíritu Santo. Eta juca tímicutijiricavahi eyehenahini espada eta ecatiuchiravahi. ¹⁸Te eyujaraca, eyaseacaya ema Viya máíjaracahe eta etumevaina. Eta eyujarasirana, tacuija tahapapiricahe eta máimitusirahehi ema Espíritu Santo. Vahi ecuyacuji eta eyaseuchiravaca namutu ena vichamuriana, majaneacavacahini ema Viya, táurivaina eta náehisirahi. ¹⁹Énerichuvare, te eyujarasirana, eyaseuchanuhini me Viya, apaesa máíjaracanhini éma eta nuvapinairava, tacuijavare tahapapiricanu eta néchajisirayare ena achaneana. Nuvaraha tasuapacarehini nayehe eta najacapacarevahi mayehe ema Viya. ²⁰Ema Viáquenu tinacanhini núde námayarehi eta máechajiriruva, nucutiyahehi mácani achane embajador mayehe ema aquenuca Emperador. Éta tíchanuhi ticaviurenuhi eta napresuchiranuhi puiti. Eta tacahehi, nutuparacahe eyujarauchanu, eyaseuchanu me Viya, máíjaracanhini eta nutumevaina eta nucametarairuyarehi nayehe namutu ena achaneana te avasareana, váhivare nucuyacujihini eta nucametarairuyarehi.

Eta táichecuaraqui eta macartane ema Pablo

²¹Tiuri puiti, máimahaherinesera ema vémunaruquenehi vichamuri Tíquico. Éma, títametacaheyare tamutu eta níchararacávahi núti. Tétavica-vahi eta máimicatasiranuhi eta vicaemataneasirahi ema Viáquenu.

²²Eta tacahe, névatacahi éma eta ara eyehe. Títametacaheyare eta víchararacavahi, tétumechaheyareva éti eta éhisiraya ema Viáquenu.

²³Puiti nuyaseacahi ema Vicaiyaquenehi émapa ema Viáquenu Jesucristo, náijaracahihini eti nuchamuriana eta enarasirahi te esamureana tamutu eta epanereruana, tajurucahivaréni eta ecasiñavairahi eta nayehe, étapa eta émunasiracacahi. ²⁴Nuyaseuchahevare táetaviuchahini eta íuricacárevaya emutu eti yátupihí éta émunasirahi ema Viáquenu Jesucristo.

Tamutupa eta néchajiriruvanahi eyehe.